



MALAYSIA

# PENYATA RASMI PARLIMEN

*Parliamentary Debates*

## KAMAR KHAS

*Special Chamber*

**PARLIMEN KEEMPAT BELAS  
PENGKAL KELIMA  
MESYUARAT PERTAMA**

## K A N D U N G A N

### UCAPAN DI BAWAH USUL BERKENAAN PERKARA TADBIR KERAJAAN [P.M. 17]:

- **Laporan Jawatankuasa Siasatan Khas Kabinet  
Berkenaan kebakaran di Wad ICU Hospital  
Sultanah Aminah pada 26 Oktober 2016**  
- *YB. Dr. Lee Boon Chye (Gopeng)* (Halaman 1)
- **Perkhidmatan Pakar Onkologi di Hospital Raja  
Permaisuri Bainun, Ipoh**  
- *YB. Tuan Wong Kah Woh (Ipoh Timur)* (Halaman 3)

**MALAYSIA  
KAMAR KHAS  
PARLIMEN KEEMPAT BELAS  
PENGKAL KELIMA  
MESYUARAT PERTAMA  
Rabu, 16 Mac 2022**

**Mesyuarat dimulakan pada pukul 2.30 petang**

**DOA**

*[Dato' Ramli bin Dato' Mohd Nor (Cameron Highlands)  
mempengerusikan Mesyuarat]*

---

**UCAPAN DI BAWAH USUL  
BERKENAAN PERKARA TADBIR KERAJAAN (P.M. 17)**

**Laporan Jawatankuasa Siasatan Khas Kabinet  
Berkenaan Kebakaran di Wad ICU Hospital Sultanah Aminah  
pada 26 Oktober 2016**

**2.34 ptg.**

**Dr. Lee Boon Chye [Gopeng]:** Terima kasih Tuan Yang di-Pertua dan terima kasih kepada Yang Berhormat Timbalan Menteri yang bersedia untuk menjawab perkara yang di bawah Peraturan Mesyuarat oleh kawasan Gopeng.

Tuan Yang di-Pertua, pada 26 Oktober 2016 wad ICU Sultanah Aminah, Johor Bharu terbakar dan menyebabkan enam pesakit yang terdiri daripada empat wanita dan dua lelaki maut. Pada hari yang sama penerangan awal berkenaan kejadian tersebut telah dibentangkan di Parlimen menerusi oleh Datuk Seri Dr. S. Subramaniam, mantan Menteri Kesihatan Malaysia ketika itu.

Selepas itu, satu Jawatankuasa Siasatan Khas Kabinet telah ditubuhkan untuk mengenal pasti punca kebakaran. Jawatankuasa itu diketuai oleh Mohd Hishamudin Yunus, bekas Hakim Mahkamah Rayuan bersama enam lagi anggota lain yang terdiri daripada mantan Pengarah Kesihatan, mantan Pengarah JPA, mantan Pengarah Jabatan Bomba dan Penyelamat, wakil Institut Keselamatan dan Kesihatan Pekerjaan Kebangsaan (NIOSH), wakil Lembaga Arkitek Malaysia serta seorang pensyarah. Hasil siasatan masih belum diumumkan ataupun dibentangkan di Parlimen sehingga sekarang.

Setelah tragedi tahun 2016 berlaku, dua lagi kejadian kebakaran berlaku di HSA Johor Bahru. Dapatan daripada siasatan jawatankuasa khas adalah penting untuk mengenal pasti punca kebakaran serta mengenal pasti pihak yang bertanggungjawab.

Seperti yang sedia maklum, perkhidmatan penyelenggaraan kejuruteraan fasiliti, penyelenggaraan kejuruteraan *biomedical*, linen dan pendobian, pengurusan sisa fasiliti kesihatan, perkhidmatan pembersihan dan perkhidmatan pengurusan fasiliti untuk Hospital Sultanah Aminah Johor Bahru, seperti kesemua hospital di bawah KKM dikendalikan oleh syarikat konsesi.

Jadi, soalan saya adalah seperti berikut:

- (i) bilakah laporan Jawatankuasa Siasatan Khas Kabinet akan dibentangkan di Parlimen?;
- (ii) adakah insiden kebakaran berpunca daripada kecuaiian penyelenggaraan kejuruteraan fasiliti ataupun penyelenggaraan kejuruteraan *biomedical*?;
- (iii) apakah langkah-langkah yang diambil oleh KKM untuk mengelakkan kebakaran berlaku di Hospital Sultanah Aminah Johor Bahru?; dan
- (iv) apakah usaha KKM untuk menilai risiko kebakaran di seluruh fasiliti KKM serta langkah diambil untuk mengatasinya.

Sekian, terima kasih.

#### 2.44ptg.

##### **Timbalan Menteri Kesihatan I [Dato' Dr. Haji Noor Azmi bin Ghazali]:**

Terima kasih Tuan Yang di-Pertua. Terima kasih Yang Berhormat Gopeng. Tuan Yang di-Pertua, untuk makluman Ahli Yang Berhormat, kerajaan tidak dapat membentangkan Laporan Jawatankuasa Siasatan Bebas Insiden Kebakaran di Hospital Sultanah Aminah Johor Baharu tersebut di Parlimen berikutan terdapat rayuan yang difailkan oleh keluarga mangsa terhadap keputusan Mahkamah Tinggi Johor Bahru.

Oleh itu, sebarang pendedahan atau ulasan terhadap kejadian kebakaran tersebut adalah bersifat subjudis dan mendedahkan kerajaan kepada risiko untuk didapati menghina Mahkamah kerana mengulas berkaitan kes yang sedang dibicarakan di Mahkamah. Sebagai makluman Yang Berhormat, terdapat banyak langkah-langkah yang telah diambil oleh Kementerian Kesihatan bagi mengelak kejadian kebakaran berlaku sama ada di Hospital Sultanah Aminah (HSA) mahupun di semua fasiliti kesihatan KKM

Mulai tahun 2017, KKM telah memperuntukkan sejumlah RM720 ribu kepada HSA bagi kerja-kerja pembaikan berkaitan pendawaian dan sistem pencegahan kebakaran. Hampir kesemua kerja-kerja tersebut telah pun selesai pada tahun 2017.

KKM juga telah menjalankan pemeriksaan sistem pendawaian elektrik secara menyeluruh di HSA. Pemeriksaan dan pengujian pemasangan sistem elektrik dilaksanakan setiap lima tahun, selaras dengan peraturan semasa, bagi menjamin keselamatannya. Malah, KKM juga telah merancang projek naik taraf sistem bekalan utama elektrik, sistem elektrik dan mekanikal di bawah Rancangan Malaysia Kesebelas (RMKe-11), dengan anggaran kos bernilai RM128 juta.

Projek ini bertujuan menyediakan sistem pencegahan kebakaran dan sistem elektrik yang mematuhi akta serta menyediakan bekalan kuasa elektrik yang mampu menampung pertambahan beban elektrik bagi infrastruktur dan peralatan perubatan yang baharu selaras dengan keperluan dan perkembangan perkhidmatan perubatan di HSA. Projek ini sedang dalam peringkat prapelaksanaan oleh Jabatan Kerja Raya.

Selain itu, KKM turut mengambil langkah mempertingkatkan peranan dan fungsi Jawatankuasa Keselamatan Kebakaran serta mengemas kini Pelan Tindakan Bencana dan Keselamatan Kebakaran di peringkat hospital.

## ■1450

Susulan itu, *Emergency Response Team* (ERT) telah ditubuhkan dan setakat ini seramai 198 kakitangan KKM telah dilatih sebagai anggota ERT. Selain itu, latihan *fire drill* dan *fire safety audit* dengan izin, juga telah dilaksanakan secara berkala dengan kerjasama Jabatan Bomba dan Penyelamat.

Tuan Yang di-Pertua, selaras dengan keputusan Mesyuarat Jemaah Menteri pada 8 Julai 2020 iaitu supaya satu pelan yang komprehensif dan model pembiayaan yang efektif dibangunkan bagi membaik pulih dan membina hospital baharu di bawah Belanjawan 2021 dan Rancangan Malaysia Ke-12, KKM sedang dalam usaha menaik taraf hospital-hospital lama yang turut merupakan langkah penilaian risiko kebakaran di fasiliti KKM.

Untuk merealisasikan pelan tersebut, KKM telah menubuhkan pasukan khas (*dedicated team*), iaitu Jawatankuasa Khas Pemandu dan Jawatankuasa Khas Teknikal, yang turut melibatkan:

- (i) Unit Perancang Ekonomi;
- (ii) Jabatan Kerja Raya; dan
- (iii) Jabatan Bomba dan Penyelamat Malaysia.

Pelan ini dimulakan dengan memfokuskan kepada 47 buah hospital lama yang berusia melebihi 50 tahun dan beberapa hospital negeri yang mempunyai beban pesakit yang tinggi. Disamping itu, KKM juga telah menyediakan Panduan Pelan Tindakan Insiden Kecemasan dan Bencana Dalaman bagi hospital-hospital KKM sebagai rujukan kepada fasiliti-fasiliti KKM dalam menangani insiden kecemasan dan bencana, termasuk kebakaran fasiliti.

KKM juga telah melantik Pegawai Keselamatan Kebakaran (*Fire Safety Officer-FSO*) di kesemua fasiliti KKM, yang bertanggungjawab menyelaras aktiviti keselamatan kebakaran, sebagai salah satu lagi usaha mengurangkan risiko kebakaran di fasiliti KKM.

Selain itu, KKM turut memastikan setiap anggota kesihatan diberi pendedahan kepada Pelan Tindakan Kecemasan dan Bencana Dalaman, termasuk menjalankan latihan secara berkala bagi memastikan kesiapsiagaan anggota menghadapi kebakaran. Sekian, terima kasih.

### **Perkhidmatan Pakar Onkologi di Hospital Raja Permaisuri Bainun, Ipoh**

#### **2.42 ptg.**

**Tuan Wong Kah Woh [Ipoh Timur]:** Terima kasih Tuan Yang di-Pertua, Tuan Yang di-Pertua, saya ingin menarik perhatian Kementerian Kesihatan Malaysia (KKM) berkenaan dengan keperluan suatu perkhidmatan pakar Onkologi yang lengkap di Hospital Raja Permaisuri Bainun (HRPB), Ipoh.

Baru-baru ini, HRPB telah ditempatkan seorang pakar Onkologi yang tetap. Ini merupakan suatu permulaan yang baik yang mana sebelum ini, pesakit-pesakit kanser di Ipoh terpaksa mendapat rawatan di Bahagian Onkologi di Hospital Kuala Lumpur, khasnya untuk rawatan radioterapi. Kos, pengangkutan dan logistik selalu menjadi masalah yang besar kepada pesakit yang terbabit.

Dengan penempatan pakar Onkologi yang tetap, saya percaya bahawa Hospital Raja Permaisuri Bainun telah bersedia untuk dinaiktarafkan sebagai

suatu pusat pemberian perkhidmatan Onkologi yang penting di Ipoh dan negeri Perak. Saya ingin mendapatkan statistik pesakit-pesakit kanser dari negeri Perak dan jumlah yang terpaksa mendapat rawatan di Hospital Kuala Lumpur atau hospital-hospital kerajaan lain sepanjang masa ini.

Apakah tindakan dan pelan jangka masa panjang KKM dalam membangunkan Bahagian Onkologi di HRPB Ipoh, termasuk pembangunan daripada segi sumber kemanusiaan untuk menjamin kakitangan yang mencukupi, peruntukan yang mencukupi untuk ubat-ubatan Onkologi serta peralatan radioterapi bagi memantapkan perkhidmatan di Hospital Raja Permaisuri Bainun, Ipoh.

Dengan itu, saya berharap pihak Kementerian Kesihatan Malaysia dapat mengkaji dan merealisasikan cadangan yang disampaikan pada hari ini demi kesejahteraan masyarakat khususnya di negeri Perak. Sekian daripada saya, ucapan Ahli Parlimen Ipoh Timur. Terima kasih.

#### **2.44ptg.**

##### **Timbalan Menteri Kesihatan I [Dato' Dr. Haji Noor Azmi bin Ghazali]:**

Terima kasih Tuan Yang di-Pertua. Terima kasih Yang Berhormat Ipoh Timur. Tuan Yang di-Pertua, kos bagi menyediakan perkhidmatan yang komprehensif dan lengkap bagi perkhidmatan rawatan kanser adalah sangat tinggi dan memerlukan tenaga pakar terlatih serta anggota klinikal sokongan, termasuk penyediaan bangunan, peralatan dan dewan bedah.

Walau bagaimanapun, Kementerian Kesihatan Malaysia (KKM), sangat prihatin dengan masalah yang dihadapi oleh pesakit kanser di seluruh negara termasuk di negeri Perak. Bagi memastikan perkhidmatan yang berkesan dan sumber-sumber dapat dioptimumkan, maka perkhidmatan rawatan penyakit kanser dilaksanakan secara berpusat (*regional*) mengikut wilayah iaitu Wilayah Utara, Wilayah Tengah, Wilayah Timur, Sabah dan Sarawak. Pada masa ini, terdapat lima zon yang mempunyai kepakaran tersebut dengan enam buah pusat kanser iaitu; Malaysia iaitu:

- (i) Institut Kanser Negara (IKN);
- (ii) Hospital Kuala Lumpur (HKL);
- (iii) Hospital Pulau Pinang (HPP);
- (iv) Hospital Sultan Ismail (HSI) Johor Bahru;
- (v) Hospital Wanita dan Kanak-kanak (HWKK), Likas; dan
- (vi) Hospital Umum Sarawak (HUS), Kuching.

Selain itu, perkhidmatan rawatan kemoterapi untuk pesakit kanser juga ada disediakan di 37 buah hospital KKM di seluruh negara. Bagi mengurangkan kesesakan wad di Hospital Kuala Lumpur dan untuk menangani kesukaran pesakit berulang-alik mendapatkan rawatan kemoterapi, KKM menyediakan perkhidmatan *ambulatory* di Hospital Raja Permaisuri Bainun (HRPB), Ipoh. Perkhidmatan kemoterapi juga disediakan di:

- (i) Hospital Seri Manjung;
- (ii) Hospital Taiping;
- (iii) Hospital Teluk Intan; dan

(iv) Hospital Slim River.

Sebagai langkah permulaan, seramai dua orang pakar Onkologi tetap akan ditempatkan di HRPB, Ipoh. Semenjak 15 Februari 2022, KKM telah menempatkan seorang tenaga pakar Onkologi di HRPB, Ipoh dan penempatan seorang lagi pakar Onkologi dicadangkan bermula pada 2 Mei 2022.

Di samping itu, terdapat juga pakar-pakar dari bidang perubatan, klinikal Hematologi, pembedahan, Ginekologi, Ortopedik dan Pediatrik terlibat dalam perawatan pesakit kanser mengikut disiplin masing-masing.

Tuan Yang di-Pertua, bilangan pesakit baharu bagi rawatan kanser yang telah dirujuk dari negeri Perak ke Jabatan Radioterapi dan Onkologi di Hospital Kuala Lumpur adalah seramai 565 pesakit pada tahun 2019, seramai 430 orang pesakit pada tahun 2020 dan seramai 398 orang pesakit pada tahun 2021.

Manakala, bilangan pesakit kanser baharu dan lama yang telah menjalani rawatan *Radical Radiation Therapy* dan *Palliative Radiation Therapy* dengan izin adalah seramai 385 orang pesakit pada tahun 2019, seramai 380 orang pesakit pada tahun 2020 dan seramai 315 pesakit pada tahun 2021. KKM juga telah menyumbangkan perkhidmatan rawatan *Radiation Therapy* di negeri Perak bagi 25 orang pesakit pada tahun 2020 dan 70 orang pesakit pada tahun 2021.

KKM telah menyediakan peruntukan tahunan bagi tujuan rawatan kanser seperti:

- (i) Pembedahan;
- (ii) Kemoterapi;
- (iii) *Radical Radiation Therapy*;
- (iv) *Brachytherapy*;
- (v) *Palliative Radiation Therapy*;
- (vi) pemindahan sumsum tulang;
- (vii) terapi hormon;
- (viii) *Immunotherapy*; dan
- (ix) ubat *Targeted Therapy*.

KKM telah membelanjakan sejumlah RM1,999,360.59 pada tahun 2020 dan RM1,797,889.50 pada tahun 2021 di bawah aktiviti Radioterapi dan Onkologi di negeri Perak. Manakala, agihan semasa bagi tahun 2022 adalah berjumlah RM1,623,263.00. Sekian, terima kasih.

**Dato' Ramli bin Dato' Mohd Nor [Cameron Highlands]:** Ahli-ahli Yang Berhormat, Mesyuarat Kamar Khas hari ini ditangguhkan keesokan harinya pada 21 Mac 2022 pada jam 2.30 petang.

**[Kamar Khas ditangguhkan pada pukul 2.48 petang]**